



REGLUR SÖNGVAKEPPNINNAR 2016

Dagskrárdeild RÚV



Efnisyfirlit

1. Söngvakeppnin - lýsing	3
1.1. Hvað er Söngvakeppnin?	3
1.2. Fyrirkomulag	3
1.3. Val á vinningslagi	3
1.4. Framkvæmdastjórn.....	3
2. Þáttökuskilyrði	3
2.1. Höfundar	3
2.2. Lög og textar	3
2.3. Tungumál	3
2.4. Listamenn og framkoma	4
3. Innsending laga	4
3.1. Fyrirkomulag innsendinga.....	4
3.2. Fjöldi laga	4
3.3. Skráning upplýsinga	4
3.4. Lagatextar	4
3.5. Meðferð innsendra laga.....	4
4. Forval laga	4
4.1. Samsetning valnefndar	4
4.2. Framkvæmd við val á lögum	4
4.3. Tilkynning til höfunda	5
4.4. Þáttökueyðublað og samningur	5
4.5. Opinberun lagavals	5
5. Undirbúningur og framleiðsla	5
5.1. Framleiðsla lags	5
5.2. Þátttakendur á sviði	5
5.3. Greiðslur til þátttakenda.....	5
5.4. Ákvörðunarvald.....	5
6. Dómnefnd	6
6.1. Samsetning dómnefndar	6
6.2. Vægi dómnefndar	6
6.3. Störf dómnefndar	6
6.4. Fyrirkomulag við jafntefli	6



7. Skuldbindingar höfunda	6
7.1. Leyfi þátttakenda	6
7.2. Samningar við þriðja aðila	6
7.3. Þátttaka í ESC 16	7
8. Réttindamál	7
8.1. Eignarréttur RÚV og EBU	7
8.2. Eignarréttur höfunda	7
8.3. Útgáfuréttur	7
9. Kynningarstarf	7
9.1. Markaðssetning	7
9.2. Kostun og auglýsingar	7
9.3. Spilun og framkoma	8
10. Ýmis mál	8
10.1. Verðlaun	8
10.2. Siðferði	8
10.3. Brot á reglum	8
10.4 Undirskrift	8
10.5. Gildistími reglna	8

1. Söngvakeppnin - lýsing

1.1. Hvað er Söngvakeppnin?

Söngvakeppnin er íslensk lagakeppni haldin af Ríkisútvarpinu ohf. (hér eftir nefnt RÚV). Í Söngvakeppninni 2016 er valið það lag sem verður framlag Íslands í forkeppni Söngvakeppni evrópskra sjónvarpsstöðva 2016 (Eurovision Song Contest 2016, hér eftir nefnt ESC 16) sem fram fer í Svíþjóð í maí 2016.

1.2. Fyrirkomulag

Söngvakeppnin 2016 fer fram í þremur beinum útsendingum í mynd-, hljóð- og rafrænum miðlum RÚV. Forkeppni verður haldin dagana 6. og 13. febrúar og úrslitakvöldið verður þann 20. febrúar 2016. Nánari staðsetning verður tilkynnt síðar. RÚV auglýsir eftir lögum í byrjun október 2015 og valin verða 12 lög til þess að taka þátt í forkeppninni. Sex lög keppa hvort kvöldið í forkeppninni og þrjú komast í úrslit í hvorri þeirra. Alls keppa því sex lög á úrslitakvöldi Söngvakeppninnar að óbreyttu. Sérstök dómnefnd, sem skipuð verður af hálfu RÚV, hefur þó möguleika á að hleypa sjöunda laginu áfram, telji hún það eiga sérstakt erindi í úrslit. Ef til þess kemur keppa sjö lög á úrslitakvöldi Söngvakeppninnar 2016.

1.3. Val á vinningslagi

Lögin 12 sem keppa í forkeppninni eru valin af sérstakri lagavalnefnd, sbr. gr. 4.1. Almennigur kys í forkeppninni í hreinni símakosningu meðan á beinni útsendingu stendur. Á úrslitakvöldinu er einnig starfandi dómnefnd og er vægi hennar 50% á móti 50% vægi símakosningar almennings. Tvö efstu lögin í samanlagðri niðurstöðu þessara tveggja skulu flutt aftur. Almennigur kys þá aftur, nú í hreinni símakosningu, og ákvarðar þannig hvaða lag sigrar í Söngvakeppninni 2016.

1.4. Framkvæmdastjórn

Framkvæmdastjórn Söngvakeppninnar fer með öll helstu málefni hennar, svo sem endurskoðun á reglum og fyrirkomulagi keppninnar, ráðningu listrænna stjórnenda sem og að meta og taka ákvarðanir í ágreiningsmálum sem upp kunna að koma í undirbúnings- og framkvæmdaferli keppninnar. Í framkvæmdastjórn sitja útvarpsstjóri, dagskrárstjóri og framleiðslustjóri sjónvarps, framkvæmdastjóri Söngvakeppninnar og aðrir þeir sem taldir eru eiga erindi í framkvæmdastjórn hverju sinni.

2. Þátttökuskilyrði

2.1. Höfundar

Þátttökurétt hafa þeir laga- og textahöfundar sem hafa íslenskt ríkisfang og/eða eru búsettir með lögheimili á Íslandi frá og með 1. september 2015 og fram yfir ESC 16. Uppfylli þátttakendur ekki þessi skilyrði teljast höfundarverk þeirra ekki tæk í keppnina.

Þátttakendum er þó heimilt að vinna lög og texta í samvinnu við aðra, þ.m.t. þá sem ekki uppfylla ofangreind skilyrði, þannig að tveir þriðju hlutar lagsins og helmingur texta séu eftir íslenska höfunda. Fastráðnum starfsmönnum Ríkisútvarpsins ohf. á ofangreindu tímabili er ekki heimilt að taka þátt í Söngvakeppninni 2016.

2.2. Lög og textar

Innsend lög og textar skulu vera ný og óútgefin höfundarverk. Þau skulu ekki vera lengri en 3 mínútur. Hvorki lag né texti má undir nokkrum kringumstæðum hafa komið út á einka- eða markaðshljóðriti, þ.m.t. á hljómplötu, geisladiski, myndbandi, í kvikmynd, á netinu eða neinu öðru útgáfuformi. Textinn má ekki hafa verið birtur opinberlega s.s. á prenti, á netinu eða annars staðar. Lag og texti mega ekki hafa verið flutt í útvarpi, sjónvarpi, á sviði, á netinu eða á opinberum samkomum. Framkvæmdastjórn Söngvakeppninnar hefur fullt vald til þess að meta hvort innsent framlag uppfyllir ofangreind skilyrði eða ekki. Komi upp vafamál í þessu samhengi hefur framkvæmdastjórn keppninnar úrslitavald og gildir úrskurður hennar.

2.3. Tungumál

Öll lög í forkeppni Söngvakeppninnar 2016 skulu flutt á íslensku. Á úrslitakvöldi keppninnar skulu öll lög, sem valin hafa verið áfram í úrslit, flutt á því tungumáli sem höfundur hyggst flytja lagið á í ESC 16 í Svíþjóð, verði lag hans fyrir valinu. Endanleg ákvörðun þarf að liggja fyrir í síðasta lagi tveim vikum fyrir forkeppni Söngvakeppninnar á Íslandi.



2.4. Listamenn og framkoma

Fjöldi þátttakenda á sviði skal vera að hámarki sex manns hvort heldur er í Söngvakeppninni eða ESC 16 og skulu þátttakendur á sviði hafa náð 16 ára aldri eigi síðar en í árslok 2015.

Allur undirleikur verður tekinn upp fyrirfram og leikinn af stafrænu tæki í undankeppni og úrslitum Söngvakeppninnar. Því verður ekki lifandi hljóðfæraleikur á sviði. Allur söngur, bæði forsöngur og bakraddir, skal þó vera í lifandi flutningi og óheimilt er að nota nokkurs konar raddlíkingar eða endurspilaðar raddir í keppninni.

3. Innsending laga

3.1. Fyrirkomulag innsendinga

Framlagi þátttakenda í Söngvakeppnina skal hlaðið upp rafrænt á vefsvæði RÚV, www.ruv.is/songvakeppnin, á tímabilinu 3. október kl. 12:00 til 2. nóvember 2015 kl. 11:59 **á hádegi**. Ekki verður hægt að hlaða upp lagi eftir þann tíma. Framlög þátttakenda, sem berast RÚV á framangreindu tímabili en uppfylla ekki reglur keppninnar, teljast ekki gjaldgeng og koma þar af leiðandi ekki til greina í vali í forkeppni Söngvakeppninnar.

Framlög sem hlaðið er upp á vefsíðu RÚV þurfa ekki að vera tilbúin í endanlegri útgáfu. Þau þurfa þó að gefa greinilega til kynna hvernig lag og laglína hljómar með undirspili ásamt einni eða fleiri söngroddum. Ef lag kemst áfram skal höfundur í samstarfi við RÚV fullvinna lagið með þeim flytjanda sem valinn verður.

3.2. Fjöldi laga

Hver lagahöfundur má að hámarki senda tvö lög í keppnina. Textahöfundum er þó heimilt að vera höfundar/meðhöfundar að fleiri en tveim textum.

3.3. Skráning upplýsinga

Þegar lagi er hlaðið upp skal einnig skrá helstu upplýsingar um lag og höfunda, þ.m.t. heiti lags, dulnefni höfunda, nafn sendanda og nafn höfunda ásamt kennitölu, heimilisfangi, símanúmeri og netfangi. Mikilvægt er að höfundur/-ar velji sér dulnefni þar sem lagavalnefnd fær aðeins uppgöfin dulnefni og nöfn laga í valferlinu.

3.4. Lagatextar

Allir höfundar skulu hlaða upp íslenskum söngtexta og merkja við hvort höfundur hyggst flytja lag á íslensku eða öðru tungumáli, komist það í úrslit. Liggja erlendur texti fyrir við innsendingu lags er höfundur frjálst að láta hann fylgja með umsókn. Ef lag skal flutt með erlendum texta í úrslitum skal sá texti liggja fyrir í síðasta lagi tveim vikum áður en forkeppni Söngvakeppninnar 2016 hefst. Endanleg ákvörðun um tungumál verður tekin í samráði við RÚV.

3.5. Meðferð innsendra laga

Allir sem senda inn lag en komast ekki áfram í keppnina verða látnir vita með tölvupósti í síðasta lagi 1. desember 2015. Eftir það er höfundum þeirra laga frjálst að nota lög sín á öðrum vettvangi. RÚV eyðir öllum innsendum framlögum sem ekki eru valin til þátttöku.

4. Forval laga

4.1. Samsetning valnefndar

Framkvæmdastjórn keppninnar skipar sjö manna valnefnd í samráði við FTT (Félag tónskálda og textahöfunda) og FÍH (Félag íslenskra hljómlistarmanna) og velur hún lögin sem taka þátt í forkeppni Söngvakeppninnar 2016. Það er trúnaðarmál hvernig valnefnd er skipuð en fulltrúum er skipt út á hverju ári.

4.2. Framkvæmd við val á lögum

Valnefnd kemur saman í byrjun nóvember 2015 og hlustar á öll innsend lög. Valnefndin fær eingöngu vitneskju um dulnefni höfunda og heiti laga og kýs hver nefndarmaður út frá eigin sannfæringu. Þegar vinnu valnefndar lýkur liggur fyrir listi með þeim 12 lögum sem fengu flest atkvæði nefndarinnar. Auk þess eru næstu 12 lög höfð til vara skyldu einhverjir höfundar ákveða að taka ekki þátt í keppninni eða framlög verða dæmd ógild af einhverjum ástæðum. RÚV áskilur sér rétt til að setja sig í samband við lagahöfunda og óska eftir lögum frá þeim, til viðbótar við innsend lög í keppnina.



RÚV hvetur höfunda af báðum kynjum til að taka þátt í keppninni og einsetur sér að leita leiða til að tryggja sem jöfnust kynjahlutföll varðandi dagskrárgerð í tengslum við Söngvakeppnina í samræmi við yfirlýst markmið RÚV í jafnréttismálum.

4.3. Tilkynning til höfunda

Þegar valnefnd hefur lokið störfum verður haft samband við höfunda þeirra laga sem valin hafa verið til þátttöku. Fundað verður með höfundum, þeim gerð nánari grein fyrir reglum, framgangi mála, undirbúnings- og upptökufærli auk tilhögunar forkeppni og úrslita.

4.4. Þátttökueyðublað og samningur

Höfundar þeirra laga, sem valin verða til þátttöku í undankeppni Söngvakeppninnar, þurfa að skila inn þátttökueyðublaði með gildum undirskriftum allra laga- og textahöfunda í síðasta lagi 7 dögum eftir að þeim hefur verið boðin þátttaka.

Séu fleiri en einn höfundur að einu lagi skulu höfundar velja einn fulltrúa til að fara með samningsumboð og vera tengiliður höfundahópsins. Sami aðili skrifar undir bindandi samning við RÚV um framleiðslu lags og þátttöku þess í Söngvakeppninni 2016 fyrir hönd hópsins.

4.5. Opinberun lagavals

RÚV tilkynnir opinberlega heiti laga og nöfn höfunda og flytjenda í fréttatilkynningu eða á blaðamannafundi þegar haft hefur verið samband við alla höfunda og bindandi samningar við þá liggja fyrir. Fram að þeim tíma eru niðurstöður valnefndar trúnaðarmál. Eftir tilkynningu RÚV um þátttakendur geta laga- og textahöfundar ekki dregið sig eða viðkomandi lög og texta úr keppninni.

5. Undirbúningur og framleiðsla

5.1. Framleiðsla lags

Þegar lag hefur verið valið til þátttöku velja höfundar endanlega flytjendur í samráði við RÚV og hefjast handa við gerð lokaútgáfu lagsins. Skila þarf upptöku af laginu fullunnu í þrem útgáfum í síðasta lagi fjórum vikum fyrir fyrri undankeppni:

- 1) Fullnumum master til útgáfu á CD og dreifingar í útvarpi og á vef (með hljóðfæraleik, aðalsöng og bakröddum).
- 2) Karóki-gerð til útgáfu á CD og dreifingar á vef (aðeins með undirspili ásamt bakröddum)
- 3) „Play-back“ master til að nota sem undirleik í útsendingu (aðeins með hljóðfæraleik, ekki söng eða bakröddum)

5.2. Þátttakendur á sviði

Meðfram ofangreindu þarf að velja aðra þátttakendur á sviði og sviðsetja atriðið fyrir forkeppnina sem verður í beinni útsendingu í sjónvarpi. Fagfólk á vegum RÚV veitir ráðgjöf og leiðsögn við framleiðslu lags og undirbúning atriðis.

5.3. Greiðslur til þátttakenda

RÚV greiðir fyrir framleiðslu, undirbúning og þátttöku lags út frá fyrirfram ákveðnum tóxtum sem eru nánar útlistaðir í samningi við höfunda.

5.4. Ákvörðunarvald

RÚV hefur endanlegt ákvörðunarvald um val á flytjendum, framleiðslu sjónvarpsþátta, tilhögun kynningarefnis, skipulagningu, sviðsetningu og framsetningu atriða og alla opinbera spilun. Undir þetta fellur t.d. skipan hljóðfæraleikara, uppröðun á sviði, allar sviðshreyfingar, búningar, stíliserung, leikmunir á sviði, myndvinnsla, lýsing, öll hljóðvinnsla í sal, á sviði eða í útsendingu og annað sem tilheyrir keppninni. Komi upp ágreiningur eða vafamál í tengslum við val á flytjendum eða útfærslu atriðis gildir tillaga RÚV. Náist ekki samkomulag um þessi atriði hefur RÚV fullt leyfi til að vísa lagi úr keppni og velja annað í þess stað.



6. Dómnefnd

6.1. Samsetning dómnefndar

RÚV skipar í fimm manna dómnefnd sem starfar aðeins á úrslitakvöldi Söngvakeppninnar. Í dómnefnd situr fagfólk með sérhæfingu á sviði tónlistar, svo sem laga- eða textahöfundar, söngvarar, hljóðfæraleikarar,

upptökustjórar, plötusnúðar (dj's) eða aðrir sem hafa atvinnu af tónlist eða tónlistarsköpun. Gæta skal jafnvægis í kynjahlutföllum, aldri og bakgrunni þeirra sem sitja í dómnefnd.

Fulltrúar í dómnefnd mega ekki hafa nán tengsl við höfunda eða flytjendur og ekki hafa unnið við gerð þeirra laga sem keppa til úrslita í Söngvakeppninni 2016. Þeir skulu kjósa eftir eigin sannfæringu og ávallt hafa faglegt mat að leiðarljósi. Nöfn dómnefndarmanna verða gerð opinber í síðasta lagi viku fyrir úrslitakvöld Söngvakeppninnar.

6.2. Vægi dómnefndar

Vægi dómnefndar er 50% á móti 50% vægi símakosningar almennings í fyrri kosningu í úrslitum Söngvakeppninnar. Dómnefnd kys ekki í lokaeinvíginu eftir að tvö efstu lög hafa verið endurflutt, heldur er það alfarið í höndum almennings í hreinni símakosningu.

6.3. Störf dómnefndar

Dómnefnd kemur saman á úrslitadeginum 20. febrúar og horfir á lokarennslu sem haldið er yfir daginn. Lokarennslu (einnig kallað fjölskyldurennslu) er síðasta æfing allra fyrir útsendingu kvöldsins og skulu öll atriði vera nákvæmlega eins og þau verða flutt um kvöldið. Dómnefnd metur atriðin á lokarennslinu, ekki á úrslitakvöldinu sjálfu. Þannig næst að vinna úr niðurstöðum dómnefndar og taka á mögulegum vafaatriðum eða jafntefli fyrir úrslitakvöldið. Hver dómnefndarmaður greiðir atkvæði og skilar niðurstöðum sínum á sérstöku blaði. Formaður dómnefndar tekur saman niðurstöður allra fulltrúa og kemur áfram til fulltrúa framkvæmdastjórnar keppninnar.

Komi upp tæknileg vandamál á lokarennslu sem ekki næst að leysa og sem hafa áhrif á möguleika dómnefndar til að meta atriðin á jafnréttisgrundvelli skal dómnefnd einnig horfa á beina útsendingu um kvöldið og kjósa strax að flutningi loknum. Framkvæmdastjórn keppninnar tekur ákvarðanir um slík mál í samráði við útsendingarteymi Söngvakeppninnar og dómnefnd.

6.4. Fyrirkomulag við jafntefli

Ef tvö eða fleiri lög eru jöfn eftir að stig allra dómnefndarmanna hafa verið talin saman skal úrskurðað um hvort lagið skuli vera ofar með handauppréttingu í dómnefnd. Sé enn jafnt eftir það skal yngsti dómnefndarmaður hafa úrslitavald.

Verði tvö eða fleiri lög jöfn þegar samanlögð niðurstaða dómnefndar og símakosningar er tekin saman, skal það lag vera efst sem fékk flest atkvæði úr símakosningu.

Komi til þess að lög tvö sem keppa í einvíginu á úrslitakvöldinu verði jöfn í símakosningunni, gildir fyrri símakosning kvöldsins.

7. Skuldbindingar höfunda

7.1. Leyfi þátttakenda

Höfundur/höfundar verða að hafa leyfi allra flytjenda í innsendu framlagi og tryggja að þeir viti að lag verði sent í Söngvakeppnina.

7.2. Samningar við þriðja aðila

Samningar lagahöfunda, textahöfunda eða flytjenda við plötuútgáfur, umboðsmenn, kostendur eða aðra hafa ekki nein áhrif á vinnslu, framleiðslu, dagskrárgerð eða annað sem tengist keppninni. Höfundar, flytjendur og aðrir þátttakendur, þ.m.t. plötuútgefendur, umboðsmenn og aðrir þurfa að fallast í einu og öllu á skilmála og reglur RÚV og Sambands evrópskra sjónvarpsstöðva (hér eftir nefnt EBU) varðandi keppnina.

7.3. Þátttaka í ESC 16

Höfundur/höfundar vinningslags Söngvakeppninnar 2016 skuldbinda sig til þátttöku í ESC 16 í Svíþjóð, en flytjendur lagsins verða ekki sjálfkjörnir fulltrúar Íslands né heldur aðrir listamenn sem fram komu í atriðinu. Strax að lokinni Söngvakeppni fer í gang nýtt ferli þar sem RÚV velur, að höfðu samráði við höfund/höfunda lagsins, það listafólk sem tekur þátt í ESC 16 fyrir hönd Íslands, hvort sem það er einstaklingur, sönghópur, tónlistarfólk, dansarar eða aðrir. Þeir sem verða fyrir valinu samþykkja að hlíta öllum reglum og skilmálum sem RÚV og EBU setja í tengslum við keppnina eða fyrirgera rétti sínum til þátttöku ella.

8. Réttindamál

8.1. Eignarréttur RÚV og EBU

RÚV eignast allar hljóð- og myndupptökur sem til verða vegna þátttöku laga í Söngvakeppninni og á allan og ótakmarkaðan flutnings- og útgáfurétt á þeim upptökum, til beinnar útsendingar eða til notkunar síðar, hvort heldur er í sjónvarpi, hljóðvarpi, á netinu eða í öðrum miðlum, í þáttagerð eða með hvaða öðrum hætti sem er, hvenær sem er, á meðan Söngvakeppnin og ESC 16 stendur og eftir að þeim lýkur.

EBU á einnig fullan rétt til að nýta opinbera framkomu og allar upptökur þeirra laga sem taka þátt í Söngvakeppninni og einkum sigurlagsins sem verður fulltrúi Íslands í ESC 16 samkvæmt reglum EBU. Höfundur/höfundar lags sem sigrar í Söngvakeppninni 2016 gera sérstakan útgáfusamning í tengslum við ESC 16. Sá samningur verður nánar kynntur höfundum sem valdir verða til þátttöku.

8.2. Eignarréttur höfunda

Höfundur/höfundar eiga allan höfundarrétt á lögum sínum og textum og bera sjálfir ábyrgð á að skrá lag og eignaskiptingu þess til STEFs, Sambands tónskálda og eigenda flutningsréttar. Öll stefgjöld renna óskipt til höfunda lags en vegna samninga RÚV við STEF kemur ekki til sérstakrar greiðslu beint frá RÚV til tónskálda. RÚV greiðir stefgjöld af allri notkun í útvarpi og sjónvarpi til STEFs, sem síðar úthlutar greiðslum til höfunda og eigenda flutningsréttar út frá notkun.

8.3. Útgáfuréttur

Allir þátttakendur, lagahöfundar, textasmiðir og flytjendur gangast undir þá skuldbindingu með þátttöku sinni í Söngvakeppninni 2016 að tónlist þeirra og flutningur komi út á safndiski, CD og/eða DVD, eða öðrum þeim miðli sem RÚV kys að gefa út sjálft eða í samvinnu við útgáfufyrirtæki.

Sigurvegarar í Söngvakeppninni 2016 (höfundar, flytjendur og aðrir þátttakendur) gangast undir skilmála EBU um að viðkomandi lag og texti í endanlegri gerð komi út á safnplötu ESC 16, myndband og sviðsflutningur í Svíþjóð komi út á DVD diskum ESC 16 og allt kynningarefni, ljósmyndir og annað efni sem útbúið verður í tengslum við keppnina sé nýtt að fullu á hvern þann hátt sem reglur keppninnar kveða á um.

Að keppni lokinni er höfundi/höfundum frjálst að taka upp og gefa út aðrar útgáfur af lagi sínu á eigin kostnað. Höfundur/höfundar geta einnig fengið leyfi að nýta hljóðversupptöku sem framleidd var fyrir keppnina að keppninni lokinni en þurfa að fá skriflegt leyfi frá RÚV.

9. Kynningarstarf

9.1. Markaðssetning

Markaðssetning og kynningarstarf vegna laga í keppninni verður samhæft í samráði RÚV við höfunda. Höfundar og flytjendur þurfa að vinna náið með dagskrárdeild, nýmiðladeild og kynningardeild RÚV og vera tilbúnir til að taka þátt í myndatökum, viðtölum í útvarpi, sjónvarpi og öðrum miðlum, áritunum og öðrum uppkomum sem tengjast kynningum á lögum og þátttakendum í Söngvakeppninni 2016.

9.2. Kostun og auglýsingar

Kostun vegna sviðsetningar, búninga flytjenda eða annars sem tengist flytjendum eða höfundum á persónulegum eða opinberum vettvangi í tengslum við keppnina er ekki leyfileg, nema með skriflegu leyfi RÚV.

Heiti, merki, líkingar eða önnur einkenni Söngvakeppninnar og ESC 16 má ekki undir neinum kringumstæðum nota í kynningar- eða auglýsingaskyni, hvort sem um opinberar birtingar, útgáfur eða hvað annað er að ræða, án undangenginna samninga og skriflegs leyfis RÚV og EBU.

9.3. Spilun og framkoma

Þau lög og textar, sem valin verða til þátttöku í Söngvakeppninni 2016, má **ekki á neinn hátt** flytja eða birta opinberlega, á hljóðriti, á netinu eða í neins konar miðli, fyrr en eftir fyrstu spilun og kynningu í miðlum RÚV. RÚV stýrir opinberum flutningi laganna í eigin miðlum fram að keppni. Eftir frumflutning þeirra á RÚV er höfundum frjálst að spila, flytja eða kynna (þó ekki selja) lög sín á opinberum vettvangi, í öðrum miðlum eða með hverjum þeim hætti sem þeir kjósa.

Höfundum er einnig frjálst að kynna aðrar útgáfur af lögum sínum hvenær sem er eftir opinberan frumflutning þeirra á RÚV, svo sem endurblandaða útgáfu (remix), lifandi (live) útgáfu, útgáfu með erlendum texta o.s.frv. RÚV leggur þó alltaf áherslu á opinbera útgáfu af laginu í allri spilun og **öll lög þurfa að vera flutt á íslensku í forkeppninni.**

Allar meiriháttar ákvarðanir skulu ræddar við framkvæmdastjórn keppinnar og þeim gerð grein fyrir með hvaða hætti höfundar hyggjast kynna lög sín. Gæta þarf háttsemi í hvítetna og hafa hugfast að höfundar og flytjendur eru fulltrúar RÚV meðan á keppni stendur.

10. Ýmis mál

10.1. Verðlaun

Höfundar sigurlagsins fá **eina milljón króna** í verðlaun. Upphæðin er ekki ætluð til framleiðslu lagsins heldur sem verðlaunafé til eigin ráðstöfunar.

10.2. Siðferði

Höfundar og þátttakendur þurfa að heita því að halda trúnað og hafa ekki í frammi ósæmilega hegðun sem getur sært blygðunarkennd áhorfenda eða annarra þátttakenda eða komið óorði á Söngvakeppnina, RÚV eða ESC. Textar, ræður eða látbragð/sviðshreyfingar af pólitískum eða svipuðum toga eru ekki leyfilegar í Söngvakeppninni eða ESC 16. Það sama á við um gróf blótsyrði eða annað óviðunandi orðbragð í lagatextum. Einnig er óheimill allur áróður eða annað í þeim dúr í lagatextum eða sviðsetningu laga í Söngvakeppninni eða í ESC 16. Brot á þessari reglu getur leitt til brottvísunar úr keppni.

10.3. Brot á reglum

Komi til þess að þátttakendur, flytjendur, höfundar laga eða texta eða aðrir sem tengjast flutningi laganna brjóti reglur keppinnar, hvort heldur er reglur Söngvakeppinnar 2016 eða ESC 16, áskilur RÚV sér fullt vald til að útiloka viðkomandi frá frekari þátttöku án þess að til komi nokkur greiðsla eða bætur. Hafi viðkomandi þegar hlotið einhverjar greiðslur af hálfu RÚV eða samstarfsaðila, áskilur RÚV sér rétt til að krefjast fullrar endurgreiðslu og/eða bóta.

Við brot á reglum um útgáfu, sem og öðrum reglum Söngvakeppinnar 2016, er orsakast af samningi söngvara/flytjanda við þriðja aðila (t.a.m. útgáfufyrirtæki), ber söngvarinn/flytjandinn einn alla ábyrgð á þeim kröfum sem fram kunna að koma frá þriðja aðila. RÚV tekur enga ábyrgð á því samningsbroti og ber engan kostnað vegna þess.

10.4 Undirskrift

Lagahöfundur/-höfundar og textahöfundur/-höfundar skuldbinda sig með undirskrift sinni á þáttökueyðublaði til að hlíta þessum reglum og reglum ESC 16 í einu og öllu.

10.5. Gildistími reglna

Þessar reglur eru settar af RÚV og taka gildi 2. október 2015. RÚV áskilur sér fullan rétt til að breyta reglumunum, túlka þær nánar og skera úr um öll vafaatriði sem upp kunna að koma.

*Framkvæmdastjórn Söngvakeppinnar
Dagskrárdeild RÚV
október 2015*